

補充資料

供燈之功德

《佛說施燈功德經》

「舍利弗！若比丘、比丘尼、沙彌、沙彌尼、優婆塞、優婆夷，發清淨心，為求福故、為愛樂福故，思念如來無上方便本行滿足，盡未來際一切生死，於現在世成就無量無著戒、定、智慧、解脫、解脫知見，乃至念佛一種功德。念功德已，於無量億那由他百千劫中，所習善根三明福田所、清淨戒所、無等等戒所、無量真實大功德所，或於塔廟諸形像前，而設供養。為供養故，奉施燈明，乃至以少燈炷，或酥油塗然，持以奉施，其明唯照道之一階。

「舍利弗！如此福德非是一切聲聞、緣覺所能了知，唯佛·如來乃能知也！舍利弗！求世報者，福德尚爾，何況以清淨深樂心，不求果報，安住恭敬，相續無間念佛功德！善男子、善女人等所生福德，舍利弗！照道一階福德尚爾，何況全照諸階道也，二階道、或三階道、或四階道；或及塔身一級、二級乃至多級；一面、二面乃至多面及佛形像！

「舍利弗！彼所燃燈，或時速滅，或風吹滅，或油盡滅，或炷盡滅，或俱盡滅。譬如諸龍以瞋恚故，出雲垂布，於中起電，起已尋滅。

「舍利弗！如是少時於佛塔廟奉施燈明，若彼比丘、比丘尼、沙彌、沙彌尼、優婆塞、優婆夷，若復餘人不受戒者，為樂善故，護己身故，信佛、法、僧，如是少燈奉施福田，所得果報福德之聚，唯佛能知。一切世間天、人、魔、梵、沙門、婆羅門，乃至聲聞、辟支佛等所不能知。如是然少燈明，所受福報不可得說。

「舍利弗！諸佛境界不可思議，唯有如來乃知此義。舍利弗！彼施燈者，所得福聚無量無邊，不可算數，唯有如來乃能了知。舍利弗！然少燈明福德尚爾，不可算數，況我滅後於佛塔寺，若自作、若教他作，或然一燈、二燈乃至多燈，香花、瓔珞、寶幢、幡蓋及餘種種勝妙供養！

轉輪聖王之象寶

《大薩遮尼乾子所說經》卷第三

爾時國王嚴熾王聞大薩遮尼乾子所說正法，歡喜信受，即時問訊大薩遮尼乾子言：「大師仁慈而能遠涉遊化眾生，道路多難，不審大師，四大調和，氣力安不？眾生易化不？諸弟子眾如說行不？幸蒙大師不恥(嫌棄)我國，今得奉見聞說正法，我心歡喜，如見慈母、如饑得食、如渴得水、如裸得衣、如貧得寶、如熱得涼、如寒得火、如盲得視、如聾得聽、如囚得赦、如賤得貴、如迷得返、如學逢師，我心歡喜，亦復如是。」

...(略)...

王言：「大師！轉輪聖王依何因得第四象寶？」

答言：「大王！轉輪聖王依離瞋心不善業故，得於象寶，受於第一最勝乘樂。」

王言：「大師！云何名為最勝乘樂？」

「大王當知！彼大象寶猶如良馬，調伏柔軟，隨自在用，降伏他國。七支善住，所謂四足、鼻及陰、尾，是七種支善住大力，力能堪敵凡象千數，白如凝雪。譬如帝釋伊羅鉢羅象，一

切凡象無能現前來嗅香者。大王！彼象能於三處有自在用，所謂虛空、水中、陸地。大王！彼象能速疾行，一日三匝行閻浮提。

「大王當知！彼轉輪王乘象王者，彼時象王與王心同，隨王念處即從而去，行步平正猶如鵝王，不疾不遲、不曲不戾，凡人中行不令驚怖，乃至女人有摩觸者，心不瞋嬈。至鬪戰時，極能現大兇害之相，不可侵近。行、住、坐、臥、眠、食、拘繫，一絲能掣牽挽去住，隨順無違，是名轉輪聖王象寶之用，令王受於最勝乘樂。」

名相解釋

【福田】（丁福保《佛學大辭典》）

（術語）田以生長為義，於應供養者供養之，則能受諸福報，猶如農夫播種於田畝，有秋收之利。故名福田。探玄記六曰：「生我福故名福田。」無量壽經淨影疏曰：「生世福善如田生物，故名福田。」

【良福田】（丁福保《佛學大辭典》）

（術語）善良之福田，謂三寶也。以供養三寶則生無量福利故也。無量義經曰：「是諸眾生大良福田。」行事鈔下三之四曰：「經云：眾僧良福田，亦是蒺藜園。」

【八福田】（丁福保《佛學大辭典》）

（名數）梵網經有八福田之目，諸師解釋不同。

天台戒疏下曰：「八福田者：一佛、二聖人、三和尚（受戒本師）、四闍梨（受戒時教授威儀之阿闍梨）、五僧、六父、七母、八病人。」（諸家多用之），此中佛與聖人及僧為敬田，和尚、闍梨、父母為恩田，病人為悲田，若人向此八種能恭敬供養，慈愍惠施，則皆能生無量之福果，故曰福田。

賢首之梵網經戒本疏三更舉三種之異說：「八福田者，有人云：一造曠路美井、二水路橋梁、三平治險路、四孝事父母、五供養沙門、六供養病人、七救濟苦厄、八設無遮大會，未見出何聖教。有云：供養三寶為三、四父母、五師僧、六貧窮、七病人、八畜生，亦未見教。賢愚經（現在課本 P92L1C-3）云：施五人得福無量，一知法人、二遠行人、三遠去人、四饑餓人、五病人，是以三寶亦為八種。」

【毘嵐】（丁福保《佛學大辭典》）

（雜名）梵 **Vairambhaka**。又作毘藍，鞞嵐，毘藍婆，鞞藍婆，吠藍婆，吠嵐婆，吠嵐僧伽。譯曰迅猛風。暴風名。

玄應音義一曰：「毘嵐，或作毘藍婆，或作鞞嵐，或云吠藍，或作隨嵐，或言旋藍，皆是梵之楚夏耳。此譯云迅猛風也。」

慧苑音義上曰：「毘藍風，正云吠藍婆。吠者散也，藍婆者所至也。曰：此風所至之處，悉皆散壞也。又云：毘者不也，藍婆者遲也。謂此風行最極迅急也。舊翻為迅猛風是也。其水輪下風輪亦與此風輪同名也。」

慧琳音義十三曰：「吠嵐僧伽，劫災時大猛風名也。此風猛暴，能壞世界。」

【授記】（丁福保《佛學大辭典》）

（術語）梵云和伽羅 **Vyākaraṇa**，十二部經之一。佛對發心之眾生授與當來必當作佛之記別也。

【十號】（丁福保《佛學大辭典》）

（術語）劫初諸說上，皆有萬名，眾生漸鈍，則減為千名（如帝釋之千名），眾生彌昧，則減為百名，眾生更愚，則減為今之而十名。天竺俗法有十名，天上利根，尚有百名，大日如來天上成道，故應之而立百八號，釋尊於人界成道，故亦應之而立十號。其十號者：

一、如來，梵曰多陀阿伽陀 **Tathāgata**，成實論謂乘如實之道而來，而成正覺，故名如來。

又大論（大智度論之略名）謂佛如自安穩之道而來，此佛亦如是而來，故名如來。

二、應供，梵曰阿羅訶 **Arhat**，應於人天之供養，故名應供。

三、正徧知，梵曰三藐三佛陀 **Samyaksambuddha**，正徧知一切之法，故名正徧知。

四、明行足。梵曰鞞多庶羅那三般那 **Vidyācaraṇa-saāmpanna**，三明（三達）之行具足，故名明行足。

五、善逝，梵曰修伽陀 **Sugata**，又曰好去好去，以一切智為大車，行八正道而入涅槃，故名善逝。

六、世間解，梵曰路伽憊 **Lokavid**，能解世間之有情非情事，故名世間解。

七、無上士，梵曰阿耨多羅 **Anuttara**，在諸法中，如涅槃無上，在一切眾生中，佛亦無上，故名無上士。

八、調御丈夫，梵曰富樓沙曇藐婆羅提 **Puruṣa-damya-sārathi**，佛某時以柔軟語，某時以苦切語，能調御丈夫，使人善道，故名調御丈夫。

九、天人師，梵曰舍多提婆魔菟沙喃 **Śāstā-devamanuṣyānām**，佛為人及天之導師，能教示其應作不應作，故名天人師。

十、佛世尊，梵曰佛陀路迦那他 **Buddha-lokanātha**，佛陀譯言知者或覺者，世尊者，為世尊重之義。

然而此中分佛與世尊，則為十一號，惟成實論等合無上士與調御丈夫為一號，故至世尊，正為十號。蓋以具前之九號，為世尊重，故名世尊也。又大論別開此二者，至佛，正為十號，世尊別為尊號。蓋具上十號之德，故稱為世尊也。梵曰薄伽梵 **Bhaganān** 者即是。見智度論，瑜祇經疏。尚詳釋於各項。

【德行】（丁福保《佛學大辭典》）

（術語）所成之善謂為德，能成之道謂為行，即功德與行法也，又具足功德之行法也。三學六度是也。仁王經上曰：「有十億七賢居士德行具足。」

【無盡燈】

佛學常見辭彙（陳義孝）：

譬喻一人將佛法輾轉開導百千萬人，甚至於無窮盡的人，正如將一燈點燃起百千萬盞燈，燈燈無盡，光光不絕一樣。

丁福保《佛學大辭典》：

（譬喻）法門名。以一人之法展轉開導百千人而無盡，譬如以一燈燃百燈，故云無盡燈。維摩經菩薩品曰：「維摩詰言：諸姊有法門名無盡燈，汝等當學。無盡燈者，譬如一燈然百千燈，冥者皆明，明終不盡。如是諸姊，夫一菩薩開導百千眾生，令發阿耨多羅三藐三菩提，於其道意亦不減盡，隨所說法而自增益一切善法，是名無盡燈也。」

【善巧】（丁福保《佛學大辭典》）

（術語）善良巧妙之方便也。佛地論七曰：「稱順機宜，故名善巧。」文句二曰：「顯善權曲折，明觀行精微。」文句私記三末曰：「舊譯以方便並為善權，若唐三藏翻為善巧。」

【十善巧】（丁福保《佛學大辭典》）

（名數）緣覺之所觀也：

- 一、蘊善巧，為五蘊。
- 二、處善巧，為十二處。
- 三、界善巧，為十八界。
- 四、緣起善巧，為十二因緣。
- 五、處非處善巧，善之因果為處惡之因果為非處。
- 六、根善巧，信等五根，總為二十二根。
- 七、世善巧，為三世之道理。
- 八、諦善巧，為四諦世出世之因果。
- 九、乘善巧，為二乘三乘等之義。
- 十、有為無為善巧，為依他、圓成之二性。（三性：遍計所執性、依他起性、圓成實性）見辨中論。

【利益安樂】（法相辭典(朱芾煌編)）

佛地經論七卷九頁云：

令修善因，名為利益。令得樂果，名為安樂。又令離惡，名為利益。令其攝善，名為安樂。又拔其苦，名為利益。施與其樂，名為安樂。此世他世、世出世等，應知亦爾。

【金光明鼓】（丁福保《佛學大辭典》）

（故事）金光明經，單云金鼓。最勝王經云金光明鼓曰：「金光明鼓出妙聲，遍至三千大千世界。能滅三塗極塗罪，及以人中諸苦厄。」

【五淨居天】（丁福保《佛學大辭典》）

（名數）色界第四禪，證不還果之聖者所生之處有五地：一、無煩天，無一切煩雜之處。二、無熱天，無一切熱惱之處。三、善現天，能現勝法之處。四、善見天，能見勝法之處。五、色究竟天，色天最勝之處。俱舍頌疏世品一曰：「此五名淨居天，唯聖人居，無異生雜，故名淨居。」

【香湯】（丁福保《佛學大辭典》）

（物名）密教有以香湯洗身之法，加合香藥三十二味。見最勝王經七。